

# تاریخ عثمانی انجمنی

۱ نیان  
۱۳۳۱

پنجمی سنہ  
نومبر ۳۱

مجموعہ سی

---

## مرعش والبستانده ذوالقدر [ دولغادر ] اوغللری حکومتی

( ۳۰ نجی نسخه دن مابعد )

### سلیمان بك بن ناصرالدين محمد بك

هجرتك ۸۴۶ تاريخنده دولغادرلی تختته چيقدی. سلیمان بك يك سميز برآدم اولدینی جهته بالطبع تپرور و جنس لطيف نسوانی دنياده هرشیدن زیاده سورایدی. عدد زوجاتی دردن آشانی دوشورمدیکی کچی سرانی پری پیکر جاریلرله زبب آورایدی. وجودنده کی فرط سن کیده رك رکوب و تزوله مانع اولدیغندن زمانی تپرورلك مخصوصاتندن اولان يمك و ایچمکله وزوجه و جاریلرله اکلنمکله کچیردی. طولایسیله دولغادرلی اهالیسوده برآسوده کی نام ایچنده اوقاتکنذار اولدی. مشارالیهک برکت تناسلیه سنه مقیاس اولق اوزره سراینده برکونده تام قرق بيشك سالانمش اولدینی تاریخلر حکایه ایدیور.

سلیمان بك تاریخچه اونه کی بکلر قدر برعلاقه حماستی یوقسه ده زمان حکومتنده - مزاج عصرک کلیاً خلافه اوله رق - بر قارنجی بیسه ایجتامش اولسی حقا که بر فضیلت مخصوصه در.

سلیمان بك درگاه عثمانی به قارشو بسلدیکی صمیمیت و خصوصیت کیتدیجه آرنمسیله آرده مراسله و دادکارانه اکسیک اولزدی. اولوقکی آناطولی سیاستی ایجابانندن اولان شوصبقی ارتباطک بر رابطه

جدیده صهریه ایله ده تأییدی ایچون ۸۵۳ سنه سنده سلطان مرادخان ثانی طرفندن آماسیه بکی حضرت بکک حرمی خاتون بمض خادم آغالرله کوریحی اولورق البستانه کوندرلدی . سلیمان بکک یشکین بش قزندن حلقاً و خلقاً اک کوزلی (ستی خاتون) سلطان محمدخان ثانی حضرت تارینه تزویج ایلدی . سرای هایونه و هیئت وکلای دولته منسوب بکلردن و خاتونلردن برجوغی و لاسیا سالف الذکر حضرت بکک حرمی کلین کتیرمک اوزره مخصوصاً ادرنه دن البستانه کوندرلدی . سستی خاتون محشم برکلین آلابی و بکک آغمر جهاز طاقی ایله ادرنه یه کوتورلدی . ادرنه ده شعرا یه پارلاق پارلاق قصانده مدحیه انشاد ایتدیرن برطنطنه عظیمه ایله هفته لرحه دوکون بابلدقدن و اوصره ده ایکنجه دفعه اولورق تحت سلطنته کلین سلطان مرادخان ثانی عمومی احسانلره غمق ایلدکن صکره شو ایکی نیر اصالت بر برج الشرفده اجتماع ایلدی [۱] .

سلیمان بک ۱۲ سنه حکم سوروب دامادینک تبشیر جلیل محمدی ایله مبشر اولان فتح قسطنطینییه موفقیت عظیمه سی ادراک ایله بختیار ۸۵۸ تاریخنده عازم دارالقرار اولدی .

### ملک ارسلان بک بن سلیمان بک

۸۵۸ تاریخنده جالس کرسی بدر اولوب امارتی مصر سلطاننک

[۱] سستی خاتون جناب فاتحه اون سکزییل برحیات مسعودانه کچیره رک ۸۷۱ سنه سنده ادرنه ده وفات ایلدی . اوراده (سلطان جامی) خطیره سنده مدفونه در . ذیلده مندرج ۸۸۷ تاریخل کتابه مخصوصه تاریخیه سنه کوره جامع مذکورک سستی خاتونک صاغلفنده کندی طرفندن بابله بینی معناسی چیقورسه ده مشار الیها فاتح دورنده اولمش و جامع ایسه سلطان بابزید خان ثانی عصرنده یاپمش اولدینندن اساساً قیریق دوکوک برعربجه ایله یازیل اولان کتابه مذکورنک طرز تحریر و افاده سی طوغری دکلدیر . شو حالیه برابر مطالعه عاجزانه بجه سستی خاتون حین ارتحالنده اونه دنبرو اکثر خواتین سلطینده واقع اولدینی کبی کندی سرابی باغچه سنه کومولمش و جامع ده یانی باشنده صکره دن یاپمشدر .

تصدیق رسمینه اقراران ایلدی. زماننده آق قیونلی پادشاهی (اوزون حسن) له اوزون اوزادی به محارباتده بولنه رق بالنتیجه خرپوتی بدل صلح اولمق اوزره اوزون حسنه و یروب مجبوراً باریشیق بائمشدی. مملکتک برجزؤ معموری اولان خرپوتک ضیاغندن طولانی ملک ارسلان بك صوک درجهده متأز اولمسیله بوتک استردادنجه رجای معاونت ایتک اوزره مصر سلطانی خوشقدم زردینه کیدرک تشبثاده بولندینی ائنده وقاهره جامعلرینک بریسنده جمعه نمازی قیلمقده ایکن برفدائی طرفندن قتل ایدلدیکنی عالی ومشارالیهک مرعش جامعنده معتکف اولدینی حالده مصر دن کوندریلن ملاحظه اسماعیلیه دن برفدائی الیه اولدیرلدیکنی تاج التواریخ وصولاق زاده وهامر تاریخری یازیورسده متفق علیه اولان روایت صحیحه تاریخیه کوره محل قتل هر حالده مصر درو تاریخلرک بیانته کوره اوصرده مصرده ملتجی بولنان برادری شاه بوداق بکک تحریرکیله وسلطانک ترتیبه شوحنایت ایشلنشدیر. مشارالیه اوزن ایکی سنه بککک ایشلدر. تاریخ قتل ۸۷۰ سنه هجریه سیدر.

### شاه بوداق بك بن سلیمان بك

شاه بوداق بك ۸۷۰ تاریخده سلطنت مصریه طرفندن دولغادرلی صدالی امارتنه قعاد ایددی. اونه طرفندن دولغادرلی امراسی دولت علیه عثمانیه به مراجعتله برادری ملک ارسلان بکک خیمه قتلنده محرك اولمقله مغلون وبویوزدن بین الخلق مفور اولسی حسیده شاه بوداق بکک امارتنی قبول ایدمه جککرنندن یرینه برادری شهسوار بکک تعینتی استدعا ایتدیله. فاتح سلطان محمد خان حضرتلری شهسوار بکی بامنشور عالی دولغادرلی حاکمی نسب ایتدیکندن شاه بوداق بك مرعش ، شهسوار بك البستانی مرکز آنخا ایلدی. فقط شهسوار بکک سجایای برکزیده کیاست وحماسی شاه بوداق بکی کولکده براقه رق شاه بوداق بك مجبوراً مصره کتدی.

## شہسوار بك بن سلیمان بك

شہسوار بك برادرینك مصرہ عزیمتی اوزرینہ تماماً دولغادرلی مملکتہ صاحب اولدی . لیکن حادثہ نك بوشکلی آلمسی اوزرینہ مصر لیلرک انظار دقت وخصومتی کنڈیسنہ انعطاف ایتمکہ باشلادی . ۸۷۱ سنہ سنده شہسوار بکله دولغادرلی خاندانندن رستم بك آره سنده محاربه وقوع بولغه باشلادی . سلطنت مصریہ جہ بوخصوص خبر آندقدہ حلب عسکری رستم بکک امدادینہ مأمور اولدی . چونکہ شہسوار بکک شہامتی و فطانت مخصوصه نك تقدیر ایتدیردیکی وحدت عرقیہ سوقیلہ عثمانیلرہ اولان کال ارتباط و صمیمیتی مصر سلطان خوشقدمک کوزینہ بآئقده ایدی . حکومت مصریہ نك شہسوار بك علیہنہ وقوعبولان بو معاوتندن بر نمرہ حاصل اولماشدر .

شہسوار بک ایسہ برنسبت متزایدہ کسب قدرت و شهرت ایدرک باشنہ طویلانان تورکنلرہ ۸۷۲ سنہ سنده ممالک مصریہ یه آقین ایتمکہ باشلادی [۱]. بو حال سلطنت مصریہ ایچون انواع متاعب و مصارفی دعوت ایدن بر محاربه طویله مشومہ نك باشلانغی اولدی . مصر سلطانی خوشقدم نظر انتباهنی درت آچهرق شو صاحب ظهورک علیہنہ ( بردبک الجمدار [۲] ) قومانداسیلہ مکمل بر مصر اردوسی یوللادی . حلب و شام والیرینی ده آکا معاوتنہ مأمور قیلدی . برنجی مصادمه ده مصر لیلر تلفات کلیہ و یرمک صورتیلہ دوچار اتہزام اولهرق شہسوار بک مصر ممالکندن بر جوق بر تسخیر و قوماندان بردبک الجمداری اسپر ایلدی . چوقلنی اعتباریلہ صایلسی قابل اولمیان تلفاتک اک مهم قسمنی طرابلس بکی اتابک ( جانی بک الحسنی ) و دمشق آنا بکی ( قراجا الظاهری ) و حلب مقدمین

[۱] تحف الانباء فی تاریخ حلب النہا

[۲] برد : باروت . جمدار ، الجمدار عنقیدر .

الوفندن [۱] (معزز بک الحمدی) و حلب اتابکی (الماس الاشرافی) و حلب قلعه سی استاداری [۲] (محمد غریب) ک مقتولینی تشکیل ایدیوردی . برمدت صکره شہسوار بکک یداسارتندن قاجوب قورتیلان بر دیک الجمدار مصره کتدیسه ده نظر سلطانیده شہسوار بکک معناً طرفدار لعلہ مہم اولدیغندن قدسه نفی ایدلدی [۳] .

شہسوار بک دولت علیہ یه قارشو اظهار خصومت ایدن جناب فاتحک عمه زاده سی و بالفعل نصیبکرده سی قره مان اوغلی پیر احمد بکک مظاهرت ایتک ایستدی ایسه ده پیر احمد بکک اردوی ہاپون طرفندن تنکیلی مظاهرتنه میدان ویرمدی . پیر احمد بکک کب شہسوار بک دخی درکاه عثمانیہ قارشو هر صورتله فرمانبر بر عبد کتر اولق اوزره عهد و پیمان ایدرک پادشاہک مظاهرتنه و اوسایه ده ددسک تختہ نائل اولمش ایکن قره مان اوغلرینک مخصوصاتندن اولان عهد شکنلکی کوستر مکده ضبط نفس ایدہ مین پیر احمد بکک سطوت شاہانہ دن خاشااً دولفادرلی طور براغنه قاجد قدم امرتسویلاتده کی مہارت موروثہ - یلہ شہسوار بکک ذہنتہ کیرہ رک بو یوزدن بالخاصہ شہسوار بک حقتده اغبرار شاہانہ حصولہ سببت ویرمشدی [۴] .

قدرت و شہرتی آرتدقجه آرتان شہسوار بک و ارلغنه و شہسوار لغنه کونہ رک سلطنت مصریہ بی ہیجه صایمقده ایدی . عینی زمانده ایسه (ملک الاشراف قایدبای) کرسی نشین سلطنت مصریہ اولمشدی . خادم الحرمین اولق شریفلہ مباعی و ممتاز اولان قایدبای حکمداران زمانک فوقندہ بر ادعیہ عظمتلہ موقعنه . نفسنه ؛ شوکتہ مغرور بولنیور ایدی . مع هذا شہسوار بکک حالی و کوندن کونہ پارایان نجم اقبالی آلتدن آلتہ کندیخی دوشوندیریور و

[۱] مقدمین الرف : بیکباشی .

[۲] استادار باخود استادالدار ، مدیر امور و کھیا مناسنہ در .

[۳] تحف الانباء فی تاریخ حلب الشہاء ، ص : ۱۱۰

[۴] عاشق پاشا زاده تاریخی ، ص : ۱۶۹ ، ۱۷۰

باشنی از مک ایستوردی. یوقہ شہسوار بک خلعت و ہدایا کوندرمک صورت استمالتکارانہ سبیلہ طور دیرلسی و ایکی طرفدن درہ لر کبی اسلام قانی آقیدان شوفتنک یا تشدیرلسی نمکناندن ایدی . ہر نصلہ اغراض خودکامانہ منہ مغلوب اولان قایدبای طریق مسالمتہ کیتمدی . عساکر مصریہ نک انہزام مؤملی قایدبایک مسموعی اولدقدہ بیلدیرملہ بینندن اورولشہ دونہرک همان خلیفہ (المستجدباللہ)ک وقضاۃ اربمہنک و باجلہ امرانک حضوریلہ کنندی تحت ریاستدہ بر مجلس مشورت عقد ایلدی . بو مجلسجہ ویریلان قرارہ بناء شہسوار بک قارشوقوتلی براردودہاسوق اسابنہ توسل ایلدی . مع مافیہ شہسوار بک بو ائنادہ و ۸۷۳سنہ مندہ (دارندہ) قلعہ منی عنوتہ ضبط و مصر طرفندن منصوب محافظی قتل ایلدی . قایدبای بونک اوزرینہ بیک مشکلاتلہ تجہیز و (اوزبک) ک یقیداتنہ تودیع ابتدکی ایکنجی مصر اردوسنی شہسوار بک علیہنہ سوق ایلدی . اردو مصردن چیقہرق حلب یولنی طوتدی . اردونک حلبہ مواصلیلہ برابر شہسوار بک ساخنہ بر رجعتلہ آدمیم آدمیم کری بہ چکیلہرک و اشبو خدعہ حریبہنک فرقہ وارہ میان مصر اردوسنی آرقہسنی براتیہرق جورہسی صیق و قورقنچ اورمانلرلہ محاط طار بر بوغازہ کیردی . مصرک دوز و چپلاق وادیسنندن وخرمالقلرینک شکل عادیسنندن بشقہ برشی کورمامش اولان مصر لیلر شو عالم دیکردہ پل پل یانہ یونہ بائقدہ ایکن یوردلری اولق مناسبتیلہ کیریندیسنی ، چیقیندیسنی قاریش قاریش بیلن و اورمانقلر ایچندہ و قیالقلر اوزرندہ ککلک کبی سہکن دولنادر یکیتلری اورمانلر ایچندن سوکون ایلہ مصر لیلرہ آنی برغلبہ چالدی . قنا حالہ بوزولان مصر لیلردن یوزلرچہ امرا ، بیکلرچہ افراد خاک ہلاکہ سرلدی . شہسوار بکک النہ ات ، اسلحہ ، ارازا کبی تقویہ بازوی اقتدار ایدہ جک بک چوق شیر کچدی . مصر اردوسنی امرا و ضابطان و تفراتی

آراسنده وقوع بولان تلفاتك حد و حسابی بوغیدی . شوپوزغونلقدن جان قورتاره بیلن اردونك دوکونتیسی یایان و پریشان برحاله حلبه واورادن قاهره یه آقوب کلکه باشلادی . قایدبای بو حاللری ایشدکجه وکوردکجه اوفککسندن کوپلره بنیوردی .

نشئه غالبته قابنه سینمایان شهسواربك حلب شهرینی الملق طمعنه بیله دوشدی . بو ائناده و ۸۷۴ سنه سنده شهسواربك ایله سلطنت مصریه جانبندن ملاطیه والیسی اولان (قرقاس [۱]) آره سنده وقوعه کلن برمصادمه ده قرقاس غلبه ایش ایشه ده شهسواربك اخیراً تازه قوت آله رق قرقاس اوزرینه هجوم ایدوب کندیسنی اسیر و برکارگیر محبسده حبس ایتدی . بعد محبسك قیو بنجره سنی طاشله سد و بند ایله قرقاسی اچلقدن وهواسزلقدن ائتلاف ایشدر [۲] .

شهسوار بك مظفریت واقعه ایله اکتفا ائتمه رك حلبك کندیسنه ویرلمسی ایچون سلطنت مصریه یه تکلیفده بولنش ومع مافیه جواب رد آلمش ایدی . بو صروده آطنه حاکی رمضان اوغلی داود بکك شهسوارلی یه اوفق بر غلبه چالمسی قایدبایك یوره کنه سرینجه بر صو سرپمش ایشه ده آزمدت صکره شهسوار بکك مع زیاده تلافی مافات ایدرهك داود بکی مغلوب ایلدیکی خبرینك تعاقب ورودی آغزینك طلادینی قاجیردی [۳] .

شهسوار بك ۸۷۵ سنه سنده رمضان اوغلی داود بککه تکرار دوکوشوب غلبه چالیدیغدن داود بك (ایاس) قلعه نه قیاندی . شهسوار بك ده ایشك ایلروسنه وارمیه رق البستانه عودت ایلدی .

آق قیونلی پادشاهی اوزون حسن ممالک مصریه اوزرندن

[۱] قرقاس: قورقاز

[۲] افریقا دلیل

[۳] تحف الانبیا فی تاریخ حلب الشهباء



شہسوار بکہ صالحدرمق ایستدی . بوندن مقصدی مطمح انظار ملوک اولان ممالک مصریہ ال اوزآتمق اولقلہ برابر پیشکام عزمنده شہسوار بکی پک بیوک برحائل بولیوردی . بنشاء علیہ آنی اورتہ دن قالدیروب عزیم فاتحانہسنہ آچیق بریرل حاضرلامق ایستیوردی . فقط موفق اولہمادی .

قایدبای فطرۃ و سیاست و کیاست سلاطین چراکسۃ مصریہ نک اک بیوکلرندن معدود اولسیلہ نفسہ کران کلان شو بوزغونلقاری حوصلہ سلطنتہ بردرلو صغیشدیرہ مدیغندن شہسوار بکی حضرت فاتحک حمایہ مخصوصہ سندن محروم ایتک ایچون جناب فاتحہ ایلیچی و ہدیہ ارسالیہ یالتاقلدہ بولمخس و شہسوار بکدن انتقامی آلدقن صوکرہ دولقادرلی اراضینک دولت عثمانیہ ترکی وعدیلہ کندی حسابنہ لازم الاستعمال دسایس سیاسی ہر درلو ایجہ لککریلہ قوللانمش ایدی . بونک اوزرینہ جناب فاتح شہسوار بکہ مقام تحذیردہ بالدفعات نصایح لازمہ دہ بولندیسہ دہ فائدہ بخش اولدی . بو یولہ یعنی سوز دیکلمدیکی زمیندہ سلطان مصرہ جواب ویرلدی . قایدبای شوفرصدن استفادہ ایلہ جناب فاتحک بیلہ نصح وامرینی دیکلہ مین شہسوار بکہ اتباع ایلہ بیہودہ یرہ اسلام قانی دوکولماسنی توصیه یولندہ ترکن بکلرینہ آیری آیری نامہ ل و عینی زماندہ طورہ طورہ آلتونلر کوندردہ رک ہر مشکلی حل ایدن پارہ قوتیلہ ترکن بکلرینی خفیاً الہ ایتمش ایدی کہ شہسوار بکک فلاکت قطعیتہ عظیمہ سنی انتاج ایدن اسباب و عواملک اک مؤثری بو اولمشدر .

قایدبای شو صورتلہ مادی و معنوی تہیہ اسباب ظفر ایدلمش اولسنہ قناعت کلیہ حاصل ایتدی کندن ۸۷۵ سنہ سی نہایتدہ قاہرہ دن ایلک او بکہ رأس النوبہ ( امیر ایسال الاشقر [۱] ) قومانداسیلہ برطلیسہ و متعاقباً امیر ( یشیک

[۱] ایسال چغتایچہ شہزادہ ، سردار ، مشاور ، محرم مناسنہ در .

الدوادار [۱]) قیادتیه قوتلی برادو چیقاردی . شاه بوداق بك دخی بواردوایله برابر ایدی . عاجلاً برطلیمه عسکریه چیقارلسنه سبب شهسواربكك علی الففله حلبی باصمی قورقوسی ایدی .

حلبده طلیعه سیله برلشن اردو ۸۷۶ سنه سنده شهسوار بك اوزرینه یوردیدی ، حمله واحد ده عینتابی استرداد ایتدی . شهسوار بك اولادو عیالی و ذقیمت اموالی (ظلماتی [۲]) قلمه سنه کوتوروب برلشدیردی . کندوسی دونوب خصمیه برقاچ موقعده چارپشیدیسده مصر لیلرک مجلوبی اولان ترکمن بکلرینک غیرتسزلکی یوزندن هپسندده طالع حربی معکوس بولدی . نهایت جیحان نهری کنارنده خونریزانه بر محاربه وقوعه کله رک شهسوار بك هزیمت فاحشه یه اوغرادی و تلفات کلیه ویردی . شکل مغلوبیتده کی دهشت شهسوار بکی اور کوتدیکندن صولوغی ظماتی قلمه سنده آلدی و قلمه یه قپاندی . امیریشیک آرقه سنی بر اقیوب قلمه یی صتی محاصره آلتنه ایدی . شهسوار بك محاصره جهنیه هر طرفی چاره سزلك احاطه ایتسی و زرنده کی عسکر کده برر ایکیشر صاووشمقده اولسنی کوره رک سائقه یأس و اضطرارله مصر اردوسنده کی (تمرازالشمسی) بی قلمه یه دعوت ایتدی . موسی الیه صورت اجابتده اردو قاضی عسکری (شمس الدین بن اجا الحلبي) ایله برابر قلمه یه چیقیدی . حین ملاقاتده شهسوار بك فتح کلام و عرض مرام ایده رک : (بن سزه دخالت ایتک ایترسه مده مقدام بك چوق عسکر کزی قیردیغمدن شمعی اردو کاهه اینرسم قورقارم که عسکر بندن انتقام آلیر) دیمسنه . قابل

[۱] عرب املاسنه کوره (یشیک) صورتیه کتب توارنجده مقید اولان یونرکیبک همیحی (باش بك) دره . قریعده و آسیای وسطیده کنبلره (باش) و یاشلی اولانلره (فارت) تمبیر اولمسنه نظراً یونک معناسی (کنج بك) دره . دوادار دیوینتار اولسه کرکدر ، مابینجی دیمکدر .

[۲] ظماتی قیصریه جوارنده و سنیواس ولایتی حدودی داخلنده بر قلمه در ، شمعی خرابه سی موجوددر .

امیر تہراز: ( بن سنک حیاتیکی تأمین ایدہرم سکا ہیچ بر ضرر کلز )  
 جوانی ویردی، آنجق شہوار بک ہر نسلہ دخالتہ جرات ایدہ مدیکندن  
 بریکیلر قلعہ دن ایندی، اردو دخی محاصرہ یی صوک درجہ دہ تشدید  
 ایلدی، تشدیدات وقہ نہایت شہوار بکی جانندن بزدر دیکندن ایکنجی  
 دفعہ اولہرق مومی الہمائی قلعہ یہ چاغردی، بولشد قارندہ شرائط دخالتہ دائر  
 باشلانیلان مذاکرہ اوزایوب بر آرا الق دہ اردودہ مومی الہمانک شہوار بک  
 طرفندن توقینی خبر کا ذبی شایع اولدی، اردو ساعت رجه کرداب ہیجان  
 ایچندہ چالقالاندی، نہایت الامر حیاتی مؤمن و اطاعتی حالتدہ دولغارلی  
 اولکاسنک ید ادارہ سندہ ابقاسی مقرر اولدینغہ دائر یشیک لساندن  
 اولہرق مع القسم ویریلن تأمیناتہ اعتقاداً مومی الہما اوکله چاغندہ  
 شہوار بک برابر اولدینی و شہوار بکک معیتندہ بر مقدار عسکر  
 بولدینی حالہ اردو کاہہ اینہرک یشیککے کوروشدیلر .

یشیک شہوار بکک اظہار جرمت و الباس خلعت ایلدی، شہوار بک  
 قلعہ یہ عودت ایچون یشیککدن طلب اجازت ایلدکدہ اردودہ بولنان  
 شام والیسی ایلہدہ کوریشمنی توصیه ایلدی، شہوار بک مذکور والینک  
 جادرینہ کیدوب آیاقدہ طور دقدہ آره لرنده شو محاورہ مختصرہ کجدی: ( سن  
 کیمسک؟ بن شہوارم، بونجہ امر او عسا کر مصریہ یی اتلاف ایدن سن  
 دکیمسک؟ سکوت )، طرز خطابدہ کی شدتدن فرط غیظنی و سوء قصدینی بللی  
 ایتمامک و شہوار بکی قوردینی طوزاغہ قولایلقلہ دوشورمک ایچون شام  
 والیسی عادت صریحہ و جہلہ خلعت جلب و الباسنی امر ایتمیلہ یقہ سنک،  
 ویکلرینک ایچنہ صنعتکارانہ بر صورتدہ زنجیرلر یرلشد یرلش بر خلعت  
 کمال سرعت و مهارتہ احضار و الباس و زنجیرلر دہ درحال اقبال ایلدی،  
 شو الحاقانی کورن شہوار بک الجای مایوسیتلہ برابرندہ کی عسا کرہ  
 اشارت ویرمی اوزرینہ آنلردہ سل سیوف ایلہ مصر لیلر اوزرینہ  
 یوردیلر سده شام و الباسک دہ اول احتیاطاً بوصویہ قومیش اولدینی مسلح

آدملر دولفادر لیلره هجوم ایله آن واحدهده ایشلرینی بیتدیلمر. آرتق قلمهده سقوط ایتمش بولنیوردی. ایچنده کی عسکر اول بؤل اسیراً مصره سوق ایلدلکن صوکره شام والیسی ایله امیر یشیک شهسوار بکی و برادرلرینی و بوی بکلرینی ممأ و مقیداً مصره کوتوردیلر.

طوتساقلر قاهرهیه کیردکلری کون قایدابیک امریله برحقارت مخصوصه زبونکشانه اولوق اوزره صیرتلی چپلاق، باشلری قباق اولدینی حالدده دوه لره بیدریلوب بوغازلرندن ط-اقیلان آغر لاله لرك اشکنجه سی آلتنده زقاق کزدیریلرک اولوقنک عادت و وحشیانه سنجه باب زویلهده چنکاله اولدی. جسدلری برکون برکیجه چنکالده قاهره بق بعده دفن اولندی [۱]. شهسوار بکک یالکز (سلیمان بک) نامنده بک کوچک برقرداشی یشیکک شفاعتیه عفو ایلدی [۲].

شهسوار بک مسلمانجه وریلان عهد و امانه اینانه رق دخیل دوشمش ایکن شو عاقبت الیهیه اوغرادی. واقعا شهسوار بک میدان مردانکیده مصر لیلرک قلمده اونلر یاره لر آچمش ایدی. لکن عفو ی ذکوة ظفر طانیان مسلمانلر ایچون وفه دخی بر فضیلت مخصوصه اولدیغندن مصر لیلرک موسی الیه حقنده کوستردکلری قیباقلق قیباقلق تاریخک عفو ایدهیه چکی برحالدیر.

شهسوار بک قایدابای کبی ثمن میعنی کفه میزانده کورمش برچرکس کوله سی اولیوب طهارت حسب ونسبه مالک حکمدار اوغلی حکمدار وهله نادرالوجود برقهرمان روزکار اولدینی حالدده حقنده روا کوریلان شورسوا یلق عربک (اصلک فعلک یاسفر حالیا) ضرب مثلله تمثیل ایتمک ایستدیکی صویسزلق ایله آنک ایجاباتی بک کوزل تعیین ایدر.

عهدنده وفا ایتمیان یشیکک دخی بالاخره ۸۸۶ تاریخنده اورنه جهنده

[۱] تحف الانباء فی تاریخ حلب النبیه

[۲] افریقا دلیل

مغلوب اولہرق آق قیونلی بایندربک طرفدن باشنک کسلمسی انظار عمومیہ عبرتدہ (الجزاء من جنس العمل) صورت عدالتنی تمثیل ایلدیکی کچی یاوز سلطان سلیم خان مصری فتح بیوردقلرندہ الکصوک چرکس سلطاننی اولان (طومان بای [۱]) ک اسیر ایدیلوب بقای حیاتندہ دولتجہ و ملتجہ محاذیرعظیمہ ملحوظ اولمسیلہ حکم شریعت وادارہ سیاسیه نک کوستردیکی لزوم حکمت ایجایجہ خدمت پادشاهییدہ بولنان مشار الیہ شہسواربکک اوغلی علی بک یدیلہ باب زویلدہ آصلمسی امرقصاصک لایتغیر برتجلی عبرت آمیزیدر .

مرحوم شہسوار بک عاقل ، ادیب ، شجاع ، قوی القلب ، عزیزمکار برذات ایدی . حین قتلندہ الہی یاشندہ ایدی التی سنہ بکک ایتمشدر . نامنہ آلتون وکوش سکا کسدردیکی ( اخبارالدول و آثارالاول ) ک اوچیوز اوتوزنجی صحیفہ سندہ محرر ایسدہ العہ ایدیلمدی .

### شاه بوداق بک

شاه بوداق بک ۸۷۶ تاریخندہ ایکنجی دفعہ دولغادرلی کرسی امارتنہ اوطوردی .

بوصرہدہ جناب فاتح دولغادرلی مملکتہ عاٹد و عدینک انجمازینی قایدبایدن طلب ایتدیسدہ ( نہ دیدکسہ دبدک دشمنی الہ کتیردک ) جواب باردینی ویردیلر . ( آت آلان اسکداری کچدی ) ضرب مثلی بوکا مضرب اولمیدر . بونک اوزرینہ سلطان محمدخان ثانی شاه بوداغی قاجیرمق ایچون برادری علاءالدولہ یہ شہزادہ سلطان بایزیدک قپوچی باشیسیلہ برخیلی آدملر قوشدی و یوللادی . حین مصادمہدہ علاءالدولہ نک یانندہ کی ترکمن بکلری اظهار حیانتلہ عدو طرفنہ کچدیکندن علاءالدولہ بوزولدی . عسکرینک برطاقی اطرافہ داغلدینی کچی برقسیمی دہ قپوچی

[۱] طومان بای : دومان بک

باشی ایله مصرک سیس نائینه [۱] التجا ایتدیلر . علوجنابدن نصیبه دار اولیان بونائب دائره امانته جان آتان زواللی ملتجیلری اولدیروب باشلرینی مصرسلطانی قایدبایه کوندردی . صوبی اوفورمهدن ایچمیه جک قدر صوفلیق کوسترمکله برابر سلاطین چراکسه آراسنده فطانتیله واجرای خیرات وحسناته اولان فرط محبتیله تمیز ایندن قایدبایک امریله جندیان چراکسه سالف الذکر رؤس مقطوعه اسلامییه جریده میدانه کوتوروب یوارلایه رق طوب وچوکان او یونی اوینادیلر [۲]. سبحان الله اولوقت عالم اسلامک اک بیوک ایکی دولتی اولان عثمانلی ومصر دولتلری وحدت مذهبییه مستند اولان اخوت اسلامییه لازمنجه توحید قوت وغیرت ایده رک موجودیت حیاتییه فرنگلرک یداعتساف وتمصبنده سونمک اوزره اولان اندلسده کی دین قرداشلر مرکز امدادینه قوشمق واسلامتک او پارلاق لمعه مدینتی داهیة انطفادن قورومق اقدم فرائض ایکن آنلری خاطرهبیله کتورمیوبده اسلام کله لر یله طوب اویناتمق صورتیله تسکین احتراضه چالشلمسی تاریخلرک اونوده میه جنی بر فاجعه جهالتدر .

مصر لیلرک شهنسوار بک حقنده یابدقاری حیله کارانه وغدارانه معامله دن وخلف وعده متعلق مجادله دن صوک درجه ده غصبناک اولان حضرت فاتح ۸۸۵ سنه سی روم ایلی سفرلرندن اختلاس ایده بیلدیکی وقت فرصتدن بالاستفاده تکرار علاءالدوله بکه عسکر ترفیقیه شاه بوداق بک اوزرینه سوق وتسلیط ایلدی .مقاومتدن عاجز اولان شاه بوداق مصره قاچدیغندن علاءالدوله بک جانشینی اولدی .

عارفی

مابعدی وار

[۱] نایب متصرف دیمکدر .

[۲] عاشق پاشا زاده تاریخی ، ص : ۲۱۲